

Aruba Palm Beach ta carga cinco strea dentro di poco

ORANJESTAD(AAN): -- Aruba Palm Beach Resort & Casino a anuncia luna pasa, comienzo di e ultimo fase di su proyecto di renovacion y ungrading cu lo converti e hotel den uno di luho.

E renovacion di e parti pafor lo ta e culminacion di e cambionan cu a tuma lugar

na Palm Beach Resort den e ultimo añanan.


Na December di e aña aki, e trabaonan lo ta cla y Aruba Palm Beach Resort lo presenta su mes bao di e nomber "Aruba Grand".

Den un entrevista cu DIARIO, General Manager di Aruba Palm Beach Resort

Richard Velasco ta bisa cu e renovacion a dura varios aña y a costa diez miyon Dollar.

E renovacion a anda na un manera keto y nunca Aruba Palm Beach Hotel a publica tocante di dje na grandi.

Trabaonan a cuminsa cu e di ocho piso y a keda bin abao te e di cinco piso.



Djei a traha riba e cabananan, e lobby y a pone un lobby-bar nobo, sin cu mucho hende tabata sa cu Aruba Palm Beach ta bao renovacion.

Mas o menos un aña y mey pasa, despues di un conversacion cu Ministro di Turismo Tico Croes, e hotel a haye para dilanti di e pregunta ki direccion e kier bay cu su renovacion: up-scale o economico?

Cu apoyo di Ministro di Turismo y inspira pa su ideanan y vision pa cu futuro di turismo na Aruba, a dicidi e tempo ey pa converti Aruba Palm Beach den un hotel di cinco strea.

Despues di esaki, a bin e asociacion cu Prestige Resorts cu a wordo gehuur exclusivamente pa haci mercadeo di Aruba Palm Beach Hotel.

E mercadeo di Prestige Resorts ta dirigi riba un mercado rico y tambe riba atrae gruponan incentivo.

Señor Velasco ta splica cu e nomber "Aruba Grand" a bin despues cu a dicidi pa renova e parti pafu di e hotel, pone un dak nobo, drecha e di cuatro y di tres piso, mehora e pool area, cambia e landscaping, et cetera.

Tur esaki ta encera un trabao asina grandi cu a opta pa cambia e nomber pa uno cu ta refleha e magnitud di e

proyecto.

E trabao riba e di cuatro y di tres piso mester ta cla e aña aki ainda, asina General Manager Velasco ta bisa.

Trabao riba e pool area y tambe riba e landscaping nobo lo cuminsa otro aña.

E ultimo fase di e renovacion ta encera mas leu cu e entrada di e resort lo cambia, cu e restaurant lo wordo remodela y cu e cambenan cu ta directamente na beach, lo wordo converti den suites di luho.

Den e entrevista cu DIARIO, señor Velasco ta bisa cu el a haya masha bon reaccion riba e cambionan, tanto di prensa internacional cu tabata na Aruba algun siman pasa como di e guestnan di e hotel cu ta bin back tur aña.

Aruba Palm Beach Resort tin 187 camber y aunke e hotel tabata tin planea pa agrega 200 camber, e no por haci esaki debi na e moratorio riba construccion di camber di hotel valido pa pabao di brug.

Segun señor Velasco, lo mester warda te e moratorio wordo hisa pa bin cu mas camber.

Luna pasa, Aruba Palm Beach a celebra apertura di e casino nobo "Casino Merengue" bao di maneho di Thunderbird Gaming di Canada.

Riba foto, Richard Velasco.

TELEFONNAN DI DIARIO
826747- FAX 828551